

北道刊誤志 乘輶錄
北轅錄 北行日錄



北

轅

錄

周
煒
撰

中
華
書
局

北轅錄

宋 周 輝 撰

淳熙丙申十一月二十九日。詔待制敷文閣張子政。假試戶部尚書。充賀金國生辰使。皇叔祖右監門衛大將軍士褒。假開州觀察使。知東上閣門。兼客省四方館事副之。明年正月七日。陛辭出國門。初九日離行在。二十一日至淮陰。二十六日。燕館習儀。二十八日。北行引接。傳御使副館坐受其謁。上中節序立其傍。虜遣接伴使昭武大將軍尙書戶部郎中李偁。廣威將軍尙書兵部員外郎完顏宗卞。僕賓立飲。引接三盃而退。二十九日。盱眙置酒餞使介。度淮。午至泗州津亭。使副望拜如儀。接伴戎服陪立。各帶銀牌。牌樣如方響。上有蕃書急速走遞四字。上有御押。其狀如主字。虜法出使皆帶牌。有金銀木之別。朝服對立于庭。至展起居狀。三節人講參禮。使副陞廳。茶酒三行。虜法先湯後茶。少頃聯轡入城。夾道甲士執兵。直抵於館。旋供晚食果飮。如南方齋筵。先設茶筵一般。若七夕乞巧。其瓦壠。桂皮。雞腸。銀錠。金剛鐸。西施舌。取其形。蜜和麪油煎之。虜甚珍此。茶食謂夫行酒先設此品。進茶一盞。又謂之茶鑊。次供饅頭。血羹。畢羅。肚羹。滋羊餅子。解粥。肉齋羹。索麪。骨頭盤子。自後大同小異。酒味甚滴。食畢。卽鎖門。內外不通。二月一日。甫交睫間。接伴所晨衙。三節謂北家聲喏。各相呼而起。時猶未至三鼓。旋覓盃水洗漱冠櫛畢。點心已至。灌肺。油餅。棗糕。麪粥。有供糕糜處。或未暇舉筋。忽一人呼官員認馬。三節出門。馬已預定。上一上二。貼於背上。以防差誤。馬科

於民。謂之戶馬。御者不俟據鞍卽散。蓋防輿之謠言。泄穢事也。細車四輛。奉南北使副。亦以序行。車之形製。既不美觀。出館各有細紗二燭籠爲導。氣象甚不佳。亦有羗管從後。聲頓悽怨。永夜修途。行人爲之感。車每輛用驢十五頭。把車五六人。行差遲。以巨挺擊驢。謂之走車。其震蕩如逆風上下波濤間。羸車三十六輛。每輛輓以四牛。禮物私覲使介三節行李皆在焉。自起程至三許折車。真定、汴京也。蓋常先一兩程。而往來人夫及輓車牛驢。至州縣更易。六十里至臨淮縣。縣有徐城本徐國。有徐君墓。季札掛劍處卽此。是日行循汴河。河水極淺。洛口卽塞。理固應然。承平漕江淮米六百萬石。自楊子達京師。不過四十日。五十年後。乃成污渠。可寓一笑。隋隄之柳無復彷彿矣。二日至虹縣。晚宿靈璧縣。汴河自此斷流。自過泗地。皆荒瘠。兩岸奇石可愛。石產於縣鳳凰山。以小爲異。或云。花石綱所棄者。虞姬墓在西岸。雖無碑。却有村。名陰陵。靈璧舊爲鎮。亦名獻齒頭虹。本紅陽夏丘二縣地。漢書。紅陽侯立是也。訛而不改。遂名曰虹。五日至永城縣。縣本敬丘縣地。漢更敬丘曰太丘。陳寔爲之長。縣北有芒山。與碭山相接。六日至穀熟縣。十八里至南京。入陽熙門。市樓榜曰睢陽。夾道甲兵甚盛。張巡許遠廟在西門外。謂之雙忠廟。其傍則宋玉臺。此地高辛氏子閼伯所居。商丘也。武王封微子杞爲宋國。後唐號歸德軍。本朝王業所基。陸爲南京。詔卽銜城以爲大內。以歸德爲名。後陸應天府。太上皇於此登位。虜今改歸德府。及門數妓來迓。北使率皆騎驢。不約束。步武便乘騎也。入境。男子衣皆小窄。婦女衫皆極寬大。有位者便服立。止用阜紵絲。或番羅繫版襪。與阜隸畧無分別。縱反插垂頭於腰。謂之有禮。無貴賤皆著尖頭靴。所頂之巾。謂之踞鴟。七日至寧陵縣。縣本

甯城。古葛伯國。六國時屬魏。爲信陵君無忌之封。宿拱州襄陵驛。虜改曰灘州。灘河在十里外。本襄邑縣。宋襄公葬于此。故曰襄陵。八日至雍丘縣。縣故杞國。武王封禹後東樓公。縣東有葵丘。齊桓公所會也。行二十里。過空桑。伊尹所生之地。又里許。卽伊尹墓地。名三家。次過范郎廟。其地名孟莊廟。塑孟姜女。偶坐配享者蒙恬將軍也。又六十里至陳留縣。縣本鄭邑。爲陳所并。故名。實張良之封邑。或云。陳思王亦生於此。九日至東京。虜改曰南京。未到城。先過皇城寺。宜春苑。使副易朝服。三節更衣帶從。跨馬入新宋門。僞曰朝陽。虜名洪仁。樓櫓濠塹甚設。次入壘城。次入大城。人煙極凋殘。至會同館舊貢院也。接伴所得私覲。盡貨於此行。戶倍償都窮。晚食酒。貯以黃缸。味差勝。有以柑子餉承應人。得之甚喜云。謂之孔果子。按東京。春秋衛陳鄭三國之境。古大梁城也。十三日至黃河。浮航以渡。自南抵北。用船八十五隻。各闊一丈六七尺。其布置相去又各丈餘。上實箒子木。復覆以草。曳車牽馬而過。如履平地。虜以順天名橋。予觀駢頭巨艦。絳以寸金。規制堅壯。掃兵守護甚嚴。不日我國家恢復河朔。過師枕席上云。當知此橋爲利之博焉。十八里至建津。津卽袁紹渡處。十四日至湯陰縣。湯陰本蕩陰。晉侍中嵇紹死節之所。又有美里城。美河。美市。文王所囚之地。十五日至相州。閭閻繁盛。觀者如堵。二樓曰康樂。曰月白風清。又二樓曰翠樓。曰秦樓。時方賣酒其上。牌書十洲春色。酒名也。或云。韓魏公畫錦堂。今爲一貴人宅。石記猶在。好事者叩門打牌。不禁也。相出茜草。故纈名天下。銅雀臺。講武城。章河。紂之朝歌城。皆在境內。講武南有塔。聞是舊鄴於高丘相望。名七十二冢。世謂曹孟德狙詐。惑後人使迷其葬所。相實古鄴。相魏文侯始封之地。十六日至

邯鄲縣。縣古趙國邯山名。邯盡也。邯山至此而盡。凡城郭宇從邑。故字皆從邑。趙王叢臺在縣之北。開每年三月二十四日。空巷上簡子冢。冢形如硯。世謂硯子冢。程嬰公孫杵臼墓亦在焉。路逢一細車。蓋以青氈。頭段人家也。頭段者。謂貴族及將相之家。十七日至邢州。古鉅鹿郡。故邢侯國也。秦兼天下。於此置信都縣。十八日至內丘縣。內丘本漢之中丘。未至內丘。西望太行山。岡巒北走。崖谷秀傑。如昔所聞。山延袤八十里。十九日至栢鄉縣。縣本春秋晉郭邑之地。漢光武卽位於鄴之南。六十里至趙州。道經光武廟。有二石人首橫於路。俗傳光武欲渡河。二人致餉。慮洩其蹤。乃除之。又云。遇二人問途。不答。怒而斬之。已而皆石也。未至城五里。渡石橋。橋從空架起。工極堅緻。南北長十三丈。闊四之一。實隋人李春所造。元祐間。賜名安濟。有張果老驢迹。二十日至真定府。未至城。先過漣沱河。河流不甚闊。聞當春漲時。殊湍急也。真定在春秋時。屬鮮虞國。二十二日至新樂縣。縣古鮮虞國。漢中山孝王母馬昭儀隨王就國。王於是建宮於樂里。而呼爲西樂城。語訛。西爲新。四十五里至中山府。堯始封于此。二十四日至安肅軍。過白溝河。二十五日至涿州。黃帝戰蚩尤於涿鹿。卽此地。二十六日至良鄉縣。入內通侍郎李慶和。賜銀合湯藥。貼用紅綾。勅書云。勅某卿遠持慶幣。來賀誕辰。馳華隰以良勞。次郊亭而伊邇。宜有節宣之餽。以彰眷遇之優。二十七日過盧溝河。卽盧龍也。燕人呼水爲龍。呼黑爲盧。亦謂黑水河。色黑而濁。其急如箭。至燕山府外。燕賓館。赴班荆宴。少定。傳銜館伴使昭武大將軍太子少詹事蒲察明。少中大夫侍御史鄧儼爲之副。南便與之互展起居狀。繼與接伴互展辭狀。大使敬昊賜宴。軍仲賜酒果。酒九行禮畢。趨入城。初入端禮門。

次入南門，次入豐宜門，次過龍津樓，樓亦分三道，通用奪玉石扶闌，上琢爲嬰兒狀，極工巧。次入宣陽門，由馳道西南入會同館，甫就次，有天使完顏汴傳宣撫問。二十八日，忠勇校尉劉彥忠、忠翊校尉何彥來交禮物，天使烏古論賜酒果，宣威將軍充東上閣門副使郭喜說朝見儀。二十九日，辨色副使率三節入見行司，捧國書於馬上前行，初出館橫過馳道行，而御廊東西，曲尺各二百五十間，至掖門下馬，自專德門由會通承明二門入左嘉會門，趨而南至幕次，少頃鳴。罷衛士山呼，百官裏見，時方辰正，斯須於幕間見曳玉帶者五人先出，後知爲東宮親王平章令公也，繼獨引副使捧國書，頃之閣門綠衣吏來引都轄以下節之長，先入宣明門，次行政門，於隔門上面北序立，門之裏卽殿庭隙門，見副使舞蹈之節，俟禮物過，副使由右出三節自東入，拜于大氈上，上有一品至七品黑漆黃字牌子，蓋其朝署也。一氈可容數百人，遍地製成鸞鳳殿九楹，前設露臺，柱衣文繡，兩廊各三十間，中有鐘鼓樓兩，外垂金漆簾額，飾以繡，廊之西馬有繡紅繡鞍者數疋，乃高麗所進，殿門外衛士二三百人，分兩傍立，盡戴金花帽錦袍，宣明門外直至外廊皆甲士，青緇甲居左，旗執黃龍，紅緇甲居右，旗執紅龍，外廊皆銀鎗，左掖門入皆金鎗，人依一柱以立焉。仁政門左門用甲士訖，見無一人跛倚者，凡門屋下皆青隊執弓矢，人數各有差，若乃經從之處，宮殿門名，茲不具載。北宮營繕之制，初雖取則東都，而竭民膏血，終殫土木之費，瓦悉覆以琉璃，日色暉映，樓觀翬飛，圖畫莫克摹寫，佐佑之初，役民兵一百二十萬，數年方就，死者不計其數。三節既出，副使疾作，依柱以立，扶策至幕次，未畢餘禮，小底入報，小底二傳旨免禮數，至於殿門外，受衣帶，三節繼

之。是日麗夏使人同見。少留。俟其禮竟。閣門來引。復舊路出。至嘉會門。駐立久之。以麗人在門外受賜未畢也。歸館久之。宣威將軍客省使兼東上閣門盧璣到館。押伴置酒殿上。近例止就賜副使免坐第拜表謝。三節各受衣帶五事。尙書公獨以病辭。館伴所服以禮例應給。使副衣帶各七事。有靴而無笏。虜無象簡。所用皆木屨也。三十日就館。宴天使李顯全。賜宴并酒果。燕山酒固佳。是日所餉極爲醇厚。名金醕。蓋用金灑水以釀之也。三月一日雨。免入賀。不爾必致霑服失容。有習來此者言。雖雨立移時不恤也。二日天使完顏奕賜分食者。分御膳以賜之也。九日入辭。使副受書而歸。十日離館。燕古冀州地。武王封堯後於薊。卽薊縣也。隋立涿郡。唐爲幽州。天寶間曰范陽郡。陸爲盧龍軍。遼曰燕京。名析津府。皇朝改曰燕山府。虜曰大興府。二十三日至東都。未至城三二里。車夫指一土岡。云是名愁臺。乃晉少帝北狩之路。二十四日押宴鎮國上將軍鎮南軍節度使兼懷州管内觀察使高蘇賜宴并酒果。天使趙泳食畢。啓行。四月十六日至家。是行往返凡九十六日。